

20
22

ISLA ONLINE
Noticia Transparente di Gobierno

Diaranson 5 October 2022

Email: IslaOnline@gobierno.aw Tel: 528-4952



Gabinete Wever-Croes //



OCTOBER
LUNA DI CONSCIENTISACION DI
CANCER NA PECHO

ISLA
ONLINE

Noticia di Gobierno



PLAN FISCAL 2023 TA INCLUI DIFERENTE COMPENSACION PA TRECE ALIVIO FINANCIERO DEN COMUNIDAD

Siman pasa colega Minister di Finansa Xiomara Maduro a presenta e Plan Fiscal 2023. Prome Minister Evelyn Wever - Croes ta felicita henter e ekipo cu a bin cu un plan teniendo na cuenta mas tanto aspecto cu ta posibel. Den e plan ta cuminsa enfoca riba con pa haci finansa mas sostenibel y ta bin na mes momento cu compensacion considerando cu costo di bida ta halto na Aruba.

Pa locual ta e compensacionnan, Prome Minister Wever - Croes a remarca cu tin algun cu ta hopi interesante.

Por ehempel, e tarifa di inkomstenbelasting y loonbelasting ta baha cu 2%. Banda di esaki e suma liber di impuesto tambe ta bay subi.

Te cu aworaki no ta paga impuesto pa sumanan te cu 28 mil florin pa aña. Entrante prome di januari 2023, e suma aki lo bira te cu 30 mil florin.

Pues cu e aumento aki y rebaho di tarifa, lo bay haya cu riba 36 mil persona no ta bay paga e belasting aki mas. Pues loke cu bo gana, esey ta loke bo ta bay cas cu ne, Prome Minister a splica.

PENSIONADO

Pa tur esnan cu ta cobra pensioen tambe tin cambianan sumamente interesante. Manera ya a wordo anuncia, pensioen di biehes ta bay subi entrante prome di januari 2023 cu 35 florin. Awo lo bin beneficiar adicional, esta e reparatietoeslag pa pensionado ta bay subi cu 45 florin y e tarifa di impuesto ta bay baha cu 2%. Banda di esaki e suma liber di impuesto tambe ta subi te na 30 mil y pa loke ta trata parehanan casa cu tin pensioen di biehes, e peso di impuesto ta bay baha paso no ta bay conta esakinan hunto mas.



COMERCIO

Tambe ta mira cu Minister Xiomara Maduro a anuncia compensacion pa companianan. Companianan ta paga 25% di impuesto riba nan ganashi (winstbelasting), pero entrante prome di januari 2023 e tarifa ta baha na 22%.

Terminando Prome Minister a expresa cu e bunita di e pakete aki ta, cu a traves di e plan fiscal aki, a trece cambianan di impuesto cu ta bay percura cu gobierno ta haya su 'fair share' mas lihe y mas efectivamente. Pero tambe ta percura pa comunidad ricibi compensacion. Entrante prome di januari 2023, inkomstenbelasting ta bay baha, loonbelasting ta bay baha y winstbelasting ta bay baha y ta spera cu esaki ta bay trece e alivio cu cada un persona tin mester akinan na Aruba.

Prome Minister Evelyn Wever-Croes: ENTREGA DI PREMIO PA CONCURSONAN EXITOSO DI PINTA Y KLEUR

“No tabata tin un tarea facil pa scoge 16 ganado den 1218 pintura”




Diamars mainta a tuma luga na Bestuurskantoor entrega di premionan pa e concurso di pintamento di “Stima Bo Cacho” 2021 y di e concurso di pinta y kleur “Ley Di Cacho” 2022.

Presente durante e evento aki tabata Prome Minister Evelyn Wever-Croes, e ganadonan cu nan mayornan, Post Aruba, Minister Rocco Tjon, Minister Geoffrey Wever y demas ministernan cu a pasa saluda. E concurso aki a wordo organisa e aña aki pa di 4 aña consecutivo cu e meta pa conscientisa comunidad, specialmente nos muchanan, riba e importancia di cuida nan mascotanan. Un total di 1218 mucha a participa e aña aki mustrandó asina e amor grandi cu cada mucha tin pa nan mascotanan.

Prome Minister, na su turno a dirigi su mes na e muchanan presente gradiciendo nan pa nan participacion y splicando e importancia pa cu cuido y trato di nan mascotanan. Tambe el a remarca cu aki na Aruba hopi hende ta gusta y stima nan mascotanan hopi ora nan ta chikito pero ora nan bira grandi ya no ta haya e amor y atencion debido mas. Ta importante na momento cu un mucha pidi nan mayornan pa un mascota pa nan keda stime y cuide mescos, evitando asina cu e mascotanan ta caba riba caya flaco y bandona.

Aruba a introduci e Ley di Cacho pa garantisá un miho futuro pa loke ta trata e mascotanan, y ta importante pa inculca e ley aki den nos muchanan di trempan. Prome Minister a gradici e comision cu a organisa e concurso aki cu a resulta un exito rotundo, e huesnan cu no tabata tin un tarea facil pa scoge 16 ganado den 1218 pintura, Post Aruba y Minister Geoffrey Wever pa e colaboracion desde aña pasa pa saca stampia tambe.

Por ultimo, Prome Minister a gradici tur e ganadonan pa nan tempo y dedicacion pa participa na e concurso aki, na mayornan y adultonan cu ta stimula e muchanan no solamente cu pintamento y arte pero tambe pa e amor na nan mascotanan. “Ohala aki un par di aña cu nos sigui haci esaki nos ta weita tur nos mascotanan na Aruba ta wordo bon trata”, Prome Minister a termina bisando.



Premier Evelyn Wever - Croes:

GOBIERNO DI ARUBA TA FELICITA NICOLE HOEVERTSZ CU E MERITO 'ORDEN AL MERITO DEPORTIVO SURAMERICANO'

Prome Minsiter Evelyn Wever-Croes, den number di Gobierno di Aruba, ta felicita señora Nicole Hoevertsz cu recientemente a ricibi Orden Al Merito Deportivo Suramericano na Asuncion Paraguay. Un biaha mas, Nicole Hoevertsz ta wordo honra pa su añanan di dedicacion y amor pa deporte.

Nicole Hoevertsz den varios ocasion a eleva number di Aruba na nivel internacional especialmente cu su nombracion na 2021 como Vice Presidente di Comité Olimpico Internacional. Gobierno di Aruba, den e mesun aña aki a reconoce señora Hoevertsz como 'Muhe di Excelencia' como gradicimento pa su dedicacion profesional y dinamico na deporte pa Aruba.

"Aruba ta un isla chikito den Caribe y señora Hoevertsz a skirbi nos number Aruba den paisnan grandi internacionalmente. Pabien Nicole. Aruba ta orguyoso di bo. Danki pa pone nos bandera den bista di mundo henter".



5
october
2022

INVITACION PA PRENSA

UPDATE MAL TEMPO

LUGA: WAYACA 33-E (OFICINA DI BRA)

ORARIO: 7:00PM

**Bureau Rampenbestrijding Aruba ta invita bo
pa un conferencia di prensa**

Topico: Update di Mal Tempo





ERA NOBO DI ARUPARKING

Despues di un temporada di inactividad Aruparking ta cla pa wordo reactiva

Den un conferencia di prensa diaranson dia 5 di october e director di Aruparking N.V. a informa comunidad riba e maneho nobo di Aruparking. Sr. Mohamed a splica cu control riba parkeo lo cuminsa atrobe. Esaki lo sosode den fase, cuminsando cu un proceso di conscientisacion. Den e prome fase aki ta cuminsa cu repartimento di stickers pa asina tur usuario por ta bon informa y consciente, pa asina tur hende tin oportunidad pa cumpli cu e reglanan di parkeo.

E fase di conscientisacion lo tin un duracion di tres luna prome cu reactiva control di Aruparking bek unda cu si acaso a para ilegal, lo wordo sanciona. Pa awo Aruparking lo ta controlando ciudadanonan cu ta cometiendo infraccion door di plak un sticker oranje como metodo di comunica e infraccion.

Aruparking lo controla entre otro e permiso di tur esnan cu ta parkeer den vak geel. Tambe lo controla si ta para malo, por ehempel estacionando auto riba acera. Parkeervak blanco ta destina pa esnan cu ta paga na un di e parkeermeters. Aruparking ta trahando riba mantenimiento di e parkeermeters pa asina tur por wordo activa bek na comienso di 2023.

Pa loke ta trata sancion riba esnan cu ta kibra regla, riba esaki lo wordo dicidi proximamente. A palabra cu e raad van commissarissen di e empresa lo presenta nan conseho cerca Minister Ursell Arends como Minister di Transporte. Na su turno, minister lo atende

esaki den conseho di ministers y eyan lo delibera pa yega na e posicion di Gobierno. Di e forma aki ta yega na e miho solucion pa maneha parkeo den centro di ciudad y pa reactiva Aruparking den su totalidad pa 2023.

"Tin un demanda den comunidad pa un maneho di parkeo den centro di ciudad. Nos mester duna nos hendenan tempo pa custumbra cu Aruparking ta activo atrobe y pesey lo cuminsa cu un sticker actie. Asina nos hendenan lo wordo concientisa unda y con mag para. Pesey pa awo ainda no tin sancion. E decision con lo hasi esaki aki lo wordo tuma mas despues y segun nos planning," Minister Arends ta enfatisa.





TA PREPARANDO UN MEMORANDO FINANCIERO ECONOMICO NOBO PA ARUBA

E FEM 2 lo stipula e caminda nobo rumbo finansa publico manehabel



Na 2018 Minister di Finansa a laga traha un Memorando Financiero Economico FEM cu tabata e guia pa Gabinete Wever-Croes traha pa yega na un finansa publico balansa. E FEM a sirbi como base pa stipula un caminda pa yega surplus den aña 2021, pero na fin di aña 2019 caba Aruba a yega na e situacion di un surplus despues di 12 aña cu nos Pais a conoce solamente deficit presupuestario. Pa aña 2020 a premira un surplus di 46 miyon florin, pero destino a dicidi otro cu e pandemia di COVID cu a afecta Aruba su economia y finansa publico grandemente.

E REALIDAD FINANCIERO TA CAMBIA

E pandemia a cambia Aruba su panorama financiero na unda nos a perde un tercer parti di nos economia y cune Pais Aruba

a perde 834 miyon florin na entrada den e ultimo 3 añanan. Gobierno mester a haci un prestamo di 1482 miyon florin di Hulanda pa por a sigura cu Aruba su economia por a wanta e efecto di e pandemia, pa tur hende por tabata tin un entrada digno, pa sigura e estabilidad di nos fondo di seguro social y di salubridad y pa cumpli cu e obligacion financiero di Aruba den exterior. Nos Pais a cuminsa recupera, turismo a yega e nivel di aña 2019 y cune nos economia ta recupera grandemente y entrada pa Gobierno ta premira di yega e nivelnan prome cu e pandemia. Sinembargo e pandemia ta laga Aruba atras cu un debe grandi riba e nivel di debe cu tabata grandi caba. E realidad financiero di Aruba ta bolbe cambia y ta pone cu mester haci algun cambio na e caminda cu nos a scoge pa yega na un finansa publico sostenibel.

Minister Xiomara Maduro:

FONDO PA MEHORA E PRODUCTO TURISTICO TA ESTRENA UN LOGO NOBO Y NAN WEBSITE

www.tpef.aw

**Asina comunidad por ta informa riba tur e proyectonan cu ta
wordo financia pa e fondo**



Siman pasa a tuma luga un evento caminda e fondo pa mehora e producto turistico, Tourism Enhancement Fund, conoci como TPEF, a conoce un logo nobo y como tambe nan a lansa nan website www.tpef.aw . Cu e pagina aki TPEF por tene comunidad informa riba tur e proyectonan cu ta wordo financia pa e fondo importante aki pa turismo di nos Pais.

Minister di Finansa Xiomara Maduro tabata presente y a haci uso di e oportunidad pa gradici personalmente e hunta di TPEF, specialmente e dos dama profesional cu ta representa Ministerio di Finansa y Cultura den TPEF. Pa medio di e fondo aki varios proyecto ta wordo realisa pa mehora e producto turistico Aruba.

E mandatario ta expresa palabra di pabien y danki na colega Minister Dangui Oduber pa su liderazgo na bienestar di turismo na Aruba.



MINISTER XIOMARA MADURO PRESENTE NA APERTURA DI DEPARTAMENTO PA ASUNTO DI GRANDINAN



Na vispera di Dia Internacional di nos Grandinan, Minister Xiomara Maduro hunto cu demas coleganan minister tabata presente na e apertura di e Departamento pa Asunto di Grandinan, Directie Ouderenzaken, cu ta resorta bou di colega Minister Ursul Arends. E departamento ta aloca den un

di nos monumentonan protegi cual ta Ex landskantoor situa na Zoutmanstraat 1, un edificio di aña 1910. E mandatario a comparti un rato ameno cu e grandinan presente y a pasa admira e muraya dedica na algun di nos Grandinan den comunidad.



A REUNI CU JGZ RIBA E MANEHO CU TIN PA NOS MUCHANAN & HOBENAN NA ARUBA

Dialuna Minister di Turismo y Salud Publico a tene un reunion cu Jeugdgezondheidszorg (JGZ) pa ta na altura di tur desaroyonan cu tin. Tambe e mandatario a comparti locual ta su vision y maneho pa cu JGZ y alaves a planea e proximo pasonan. JGZ ta un departamento di DVG cu ta traha hopi di serca cu Wit Gele Kruis. Manera ta conoci Minister Oduber su maneho ta basa riba prevencion y pesey JGZ ta hopi importante paso prevencion ta cuminsa cu nos muchanan y hobennan.



JGZ ta enfoca na yuda nos muchanan y hobennan pa cu nan salud y bienestar di momento cu nan nace te na momento cu nan tin 25 aña di edad. Nan ta brinda ayudo den tur e periodo di e mucha su bida, tambe den su adolescencia te ora e ta un hoben adulto. Nan ta duna cuida preventivo y curativo riba tereno di problemanan psicosocial, riba tereno emocional y riba salud corporal.



Minister Oduber a indica cu JGZ su programa di scol saludabel ta uno conoci caba den nos comunidad caminda nan ta enfoca riba nutricion, salud fisico y educacion den mantene un bida saludabel na nos muchanan y hobennan. Den e esaki JGZ ta traha hopi di serca cu Sociale zaken y Directive Onderwijs.

Minister Oduber ta contento di e trabounan preventivo cu JGZ ta haciendo, educando nos muchanan desde un edad jong pa ta mas saludabel. E mandatario ta sigui encurasha e comunidad di Aruba pa hiba un bida saludabel. Haci ehercicio ta e mihor medicina y prevencion den salud ta e solucion pa un miho sociedad.





Minister Geoffrey Wever den Parlamento di Aruba: E SISTEMA NACIONAL DI ESTADISTICA (NSS) TA UN TOOL ESENCIAL PA GOBIERNO, PARLAMENTO, SECTOR PRIVA, ACADEMIA Y PUBLICO EN GENERAL



Awe Minister Geoffrey Wever, encarga cu e coleccion, procesamiento y publicacion di estadistica, hunto cu representantenan di Centraal Bureau Statistiek (CBS) y Comision di e Sistema Nacional di Estadistica (Nationaal Statistisch Systeem (NSS)) Commissie), mr. Marlon Faarup, Director di CBS, dr. Desiree Helder, Presidente di e NSS Commissie y drs. Gayle Arendsz, Vice-presidente di e NSS Commissie, a duna presentacion na Parlamento di Aruba over e pogreso di implementacion di e NSS. E Sistema Nacional di Estadistica ta un cooperacion entre CBS y otro productor di estadistica oficial cu e meta di garantisar produccion di un gran variedad di estadistica oficial di calidad halto, relevante y actual pa asina esaki forma e fundamento di formulacion y evaluacion di maneho y di desaroyo sostenibel.

E informacion cu lo ser brinda door di e NSS ta un tool esencial pa gobierno pa fomenta bon gobernacion door di desaroya y monitorea maneho di manera mas responsabel y uzo mas efectivo di e fondonan di gobierno. E NSS no ta solamente pa gobierno, pero e NSS ta brinda informacion tambe na

Parlamento den nan trabou primordial di controla gobierno. E NSS ta tambe pa sector priva, mundo academico y e publico en general.

E presentacion tabata uno hopi positivo unda varios Parlamentario a expresa nan sosten pa e proyecto NSS mirando e necesidad di esaki na Aruba. Tambe Parlamentarionan a haci pregunta over e condicionnan necesario pa implementacion di e NSS y a trece dilanti e necesidad pa ora di aloca fondo pa e implementacion di NSS ta importante pa duna atencion tambe na alocacion di fondo pa training pa e usuarionan di e datos den aparato gubernamental.

“E NSS ta un proyecto cu lo duna nos e tool pa traha maneho di pais Aruba na un forma mas moderno, un forma eficiente, efectivo, participativo y transparente, yudando asina pa haci uzo di fondonan di gobierno mas efectivamente. Esaki ta un elemento esencial den bon gobernacion y mi ta spera di conta cu sosten di Parlamento di Aruba den esaki”, Minister Wever a comenta.





CONCURSO DI PINTA Y KLEUR DI LEY DI CACHO 2022 UN EXITO ROTUNDO

Diamars mainta, durante un ceremonia ameno, a haci entrega di e cuater stampianan ganado di e concurso di pintamento “Stima Bo Cacho” 2021, cual tabata un concurso, solamente pa scolnan basico. Banda di esaki tambe a haci entrega di premio di e concurso di pinta y kleur “Ley di Cacho” 2022 cu tabata pa basis y kleuter. Durante e evento aki Minister di Husticia y Asuntonan Social Sr. Rocco Tjon conhuntamente cu Minister President di Aruba Sra. Evelyn Wever-Croes, Minister Geoffrey Wever, Minister Endy Croes, y demas Ministers a haci entrega di e premionan pa e 16 ganadonan di e concurso di pintamento di ley di cacho.

Manera ta conoci, esaki tabata e di cuater aña consecutivo cu a organisa un concurso caminda a traves di nan pintura muchanan a haya e oportunidad di expresa y alabes siña tocante Aruba su Ley di Cacho. E aña aki a conta cu participacion di 1218 mucha en total, caminda un total di 50 scol a participa di cual a saca 16 ganado den diferente categoria segun e klas y a haci e entrega di e premionan aki riba dia internacional di bestia. Banda di esaki a conta tambe cu un presentacion di Post Aruba, caminda e cuater ganadonan di aña pasa a pone e stempel oficial di e cuater stampianan, y a entrega esaki na demas ministersnan.

Siguiientemente, e nombrenan, segun secuencia di categoria, di e ganadonan. Pa kleine kleuter e ganado absoluto tabata Eliza Kock na di dos lug a keda Kaysen Wyatt Emanuel Werleman. Pa Grote Kleuter a keda na prome lug a Sarah Parra y na di segundo lug a Shaniva Mangru. Pa 1e klas scol basico a keda na prome lug a Aythian Johan Curiel y na di dos lug a Rowen Tjon. Pa 2e klas, a keda na prome lug a Jaceyanne Derely Tromp y na di dos lug a Pedro Alexander Garcia Morillo. Pa 3e klas, a keda na prome lug a Padma Piar kende tabata un ganadora anteriormente y na di dos lug a keda Jo-Myanne Donato. Pa 4e klas, a keda na prome lug a Natalia Sarai Alvarado Lizardo y na di dos lug a Benjamin Molina. Pa 5e klas, a keda na prome lug a Kristin Maduro y na di dos lug a keda Valentina Casafus. Por ultimo, pa 6e klas a gana tambe pa di dos aña consecutivo Anastasia de Palm, y a keda na di




dos lug a Valentina Sofia Abreu Castañeda.

Asina por conclui cu e meta di e concurso di pinta y kleur “Ley di Cacho” 2022 tabata pa sigui conscientisa comunidad, specialmente nos muchanan, tocante e cuida debido di nan mascota. Minister Tjon tambe ta convenci cu si nos cuminsa inculca e atencion debido di nos leynan den nos muchanan, den e caso aki, e Ley di Cacho, nos lo por garantiza un miho futuro pa locual ta trata doñonan di mascota responsabel cu ta respeta e ley, y alabes nan propio cachonan. Un palabra di pabien na tur e ganadonan y un danki na e organizacion di e concurso cu e tremendo iniciativa pa e di cuater aña consecutivo.

Minister Rocco Tjon:

PROYECTO DI "CAMERA TOEZICHT" DEN PLENO PREPARACION






Durante un reunion cu e comision encarga pa ehecucion di prome fase di e proyecto di camera toezicht a toca e diferente fasenan di e proyecto. Manera ta conoci a aproba fase 1 di e proyecto aki, caminda SETAR lo bay instala bastante camera den area di Hotel. Un di metanan ta pa amplia e cantidad aki, pa cual motibo e comision hunto cu Minister di Husticia y Asuntonan Social Sr. Rocco Tjon lo reuni den November, cu diferente stakeholders di sector priva y semi publico asina pa amplia esaki y asina garantiza cu por percura pa cameranan pa cu infraestructura vital y diferente areanan publico.

Trabounan preparatorio ta den pleno ehecucion, pa asina cu cameranan wordo instala por cuminsa na januari 2023. Banda di esaki, ta papia tambe di un "smart city concept", caminda diferente sectornan lo traha hunto, lo tin cameranan cu inteligencia artificial pa facilita e trabou, y imagennan cu por wordo comparti cu Agentenan Policial atraves di e "mobile data terminals", cual lo keda inaugura na November.

Segun Minister Tjon, lo bay tin un ekipo multidisciplinario dedica na esaki so, cu lo consisti di empleadonan civil y ehecutivo. Pues, asina lo garantiza cu e imagennan por wordo monitoria constantemente. E personal lo traha den un "command center", cual na prome instante lo ta ubica na Cuerpo Policial, pero despues lo haya nan propio luga na un "remote location".

Por ultimo, na November reunionnan lo continua como tambe e preparacionnan pa amplia e cantidad di camara. e mandatario a indica cu el a keda sumamente satisfecho pa wak cu e trabounan ta canando segun e planificacion di tempo.





MINISTER ENDY CROES A RICIBI E TESIS DI THALIA CROES

Siman pasa, Minister Endy Croes a ricibi bishita di Thalia Croes kende a finalisa su estudio di Organization Governance and Management (OGM) na Universidad di Aruba. Den cuadro di su estudio Thalia a haci un investigacion titula: "What influence do principles leadership styles have on teacher job satisfaction according to schoolboards, principals and teachers of four primary schools in Aruba". Thalia a haci un investigacion riba e forma con e cabesantenan di scolnan basico ta lidera nan scolnan y con satisfecho maestronan ta cu esaki. Pa e estudio aki Thalia a uza un instrumento cu ta detecta e forma di liderazgo den enseñansa. E estilonan di lidera cu ta mas conoci na scolnan mundialmente ta: "the transformational, transactional, democratic, autocratic, servant, ethical, and laissez-faire leadership styles". Den e analisis Thalia a detecta cu na Aruba e estilo di liderazgo democratico ta mas desea pa e directivanan di scol cu e la investiga y cu e maestronan na Aruba ta scoge mas pa e "ethical leader". Minister Endy Croes ta gradici Thalia pa su bishita y su dedicacion na e estudio y pa e recomendacionnan alabes ta desea Thalia hopi exito den futuro. Y cu e deseo, disciplina, dedicacion y determinacion ta sigui logra.



MINISTER ENDY CROES A REUNI CU DIRECTIVA DI CENTRO DI BARIO Y DEPORTE DAKOTA

Recientemente Minister Endy Croes a ricibi bishita di Presidente di Centro di Bario y Deporte Dakota, sr. Jair Oduber y sra. Anky van der Linden -Vrolijk, Trahado Social. Nan a acerca e mandatario di Deporte pa informe di e ultimo desaroyonan di Centro di Bario y Deporte Dakota. Como tambe pa presenta e plannan di un bunita proyecto cu nan ta trahando ariba dje, esta un cancha di basketball/ multi funcional den e centro di bario pa renoba, estilo di e cancha na Xavier University School of Medicine uzando e mes un materialnan. Di e Centro di Bario su mes un forza nan a pone 25 mil florin den e proyecto y nan a pidi un ayudo pa por finalisa cu e proyecto pa e hubentud di Dakota. Minister Endy Croes ta di acuerdo y ta sondeando e posibilidadnan pa aloca fondonan y asina duna un aporte pa haci e soño aki bira un realidad. E cancha di basketball ta wordo renoba na e standardnan caminda campeontonan por



tuma luga den futuro. Concluyendo Minister Endy Croes a enfatisa cu nos ta sigui traha na bienestar di deporte y pa tin recreacion sano den e barionan na Aruba.

MINISTER ENDY CROES A RICIBI BISHITA DEPORTIVO DI SR. MOHAMMED ALZENKAWI DI KUWEIT

Diaranson ultimo organisadonan di e Monster Truck Show, Brazilian Flash; sr. Tito Tromp, sr. Jonathan Tromp y sr. Alvin Dirksz tabata di bishita cerca Minister di Deporte. Na e ocasion aki pa introduci un amigo di nan di Kuweit esta sr. Mohammed Alzenkawi kende ta manager di Basil Al-Salem Al-Sabah Motors Racing Club (BMRC) na Kuweit. Miembro di Brazilian Flash, sr. Alvin Dirksz ta trahando den refineria na Kuweit y asina a cera amistad cu sr. Alzenkawi kende tin un pasion pa motorsport tanto drifting alabes e mes ta driver di pro bike. Riba un invitacion special di Brazilian Flash pa prome biaha sr. Mohammed Alzenkawi a bishita Aruba pa e Monster Truck Event. Sr. Mohammed a keda masha impresiona cu un isla asina bunita na e banda di mundo aki. Durante e bishita a expresa e deseo pa forma un evento di drifting (cual Kuweit ta experto aden) pa asina intercambia kisas 4 a 5 auto di Aruba y Curaçao pa un competencia na Kuweit y den futuro auton profesional di Kuweit por bishita Aruba. A traves di e contacto aki pa februari 2023 un persona di taya di Kuweit



ta na Aruba. Ken sa cu deporte ta habri portanan cu nunca nos a spera pa Aruba. Sr. Mohammed Alzenkawi a keda masha contento y a obsekia Minister Endy Croes un detaye di gradicimento y aprecio. Por subi website www.bmrc.com.kw pa asina cera conoci cu e organizacion di Motorsport cu sr. Alzenkawi ta maneha. Na final Minister Endy Croes a gradici tanto miembronan di Brazilian Flash pa nan bunita evento pa entretene na nos comunidad como tambe pa sr. Mohammed Alzenkawi pa su bishita y sosten na e deporte di motor. Deporte den pleno desaroyo.

MINISTER ENDY CROES A REUNI CU ARUBA DOMINO BOND CU TA PREPARANDO PA REPRESENTA ARUBA DEN E CAMPEONATO MUNDIAL DI DOMINO

Cu ta tuma luga fin di luna di october, na Punta Cana Republica Dominicana

Recientemente Minister Endy Croes a reuni cu presidente di Aruba Domino Bond, sra. Soraida Boekhoudt y miembronan di directiva, sr. Anthony Trimon y sr. Andy Farro. Durante e reunion fructifero directiva di Aruba Domino Bond a haci peticion na e mandatario di Deporte pa sostene e atletanan cu ta participando den e campeonato mundial.



E peticion di e directiva ta encera pa duna un sosten door di paga e placa di e competencia di cada hungado, pa por participa den e toreno aki. E campeonato mundial di domino ta tuma luga fin di luna di october na Punta Cana, Republica Dominicana. Un total di 600 participante di diferente parti di

mundo cu ta competi na e torneo internacional aki. Minister Endy Croes a indica di lo cumpli cu Aruba Domino Bond pa nan por participa. Concluyendo e mandatario di Deporte ta desea e ekipo di Aruba hopi exito y cu e deseo, disciplina, dedicacion y determinacion boso ta logra.

UNION DI UTILITIES, WEB Y ELMAR TA DUNANDO RESULTADO POSITIVO PA ARUBA

Directornan di Utilities N.V, Web Aruba y Elmar kier ratifica e union aki

Pa algun aña caba, e union strategico entre Utilities, Web y Elmar ta dunando bon resultado pa e companianan y pa Aruba. E forma uni y productivo aki di traha aki ta genera beneficianan den e aspecto Financiero, Maneho, Energetico y Tecnologico.

FINANCIERO

Den e parti financiero; ya a logra un acuerdo di refinanciamiento masha importante y beneficoso pa e companianan Utilities, Web y Elmar y pa Aruba. E companianan a logra refinancia nan debe den structura nobo cual ta brinda mas acceso na capital grandi y cu interes mas abao. Ademas e companianan a haya awo mas espacio pa maneha nan prioridadnan di inversion. Utilities, Web y Elmar como compania estatal tin un responsabilidad nacional clave di mester percura pa brinda nan productonan na e prijs mas economico posibel y na mes momento garantizando su calidad y estabilidad. Pues siguridad di Energia y di Awa ta di vital importancia pa nos Economia, nos Pueblo y pa e estabilidad di e companianan.

MANEHO

Pa loke ta maneho, specialmente e parti di ehecucion di e Plan Nacional di Energia, ta sumamente valioso pa e companianan, den union, atende cu prioridadnan pa cu Energia Renobabel y e cumplimentonan di e compromisonan di Aruba pa cu tratadonan internacional manera esun di Paris. Cu transparencia, cooperacion y segun Corporate Governance Code ta evalua vision, angulo y prioridad di cada compania y cu mas participacion y conseho por tuma e miho desicionnan. E parti productivo di energia y e parti di distribucion tin cu haya su debido consideracion na momento di haci plan a corto y largo plaso.

ENERGIA

Den e aspecto energetico, recientemente Utilities, Web y Elmar a organisa e EOI (Expresion of Interest) pa un di dos Parke di Molina pa Aruba. Companianan renombra di Energia di Biento rond mundo a muestra nan interes. Ta bon pa remarca cu e proceso cu a tuma luga no tabata un destaho publico, sino un procedura pa explora e interes di companianan di Energia di Biento pa cu e oportunidadnan cu tin Aruba cu e proyecto di Rincon. Via notario a registra e companianan internacional y dentro di poco lo cuminsa cu e proceso di evaluacion. Esaki tambe tin su procedura delinea segun World Trade Organization- WTO. Den futuro hopi cercano inovacion y expansion den generacion di mas energia Solar tambe lo bay haya su debido atencion.



TECNOLOGIA

Pa loke ta trata tecnologia; E union corporativo aki di Utilities, Web y Elmar ta brinda un escenario ideal pa explora meritonan di cada tecnologia y su balor pa loke ta inversion. Cada compania estatal tin su prioridadnan, cualnan na momento di evalua y discuti e puntonan critico di cada proyecto ta brinda bentaha adicional pa tuma e mihor desicion. Por ehempel den proyecto di inversion di baterianan nobo pa almacena energia den futuro cercano, tin hopi aspecto cu mester wordo considera. Experticio di tanto WEB y ELMAR ta wordo debidamente considera.

Pues den e mundo yen di crisis y reto di awendia, trahando uni den equipo, ta crucial pa saca bentaha den tur e aspectonan menciona, pa asina logra mantene e prijs di Awa y Coriente mas abao posibel, e calidad mas halto y e siguridad y estabilidad mas duradero posibel.

Union semper ta refleha forsa y cu e comunicado aki e directornan di Utilities Aruba N.V., WEB Aruba N.V y Elmar N.V. kier ratifica e union aki.



Gabinete Wever-Croes II



Goberna- Crisis tras di crisis, reto tras di reto

Cu hopi determinacion, fe y trabou duro,
Gabinete Wever - Croes II ta trahando pa
recupera nos dushi isla Aruba.

Gobierno no por haci esaki su so y ta conta cu
sosten di comunidad pa hunto nos lanta

Aruba